

編號 1 號

【行出第一步】劉懿玲原作

人生有當多个「第一擺」，比論講還細時節第一擺騎自行車、第一擺蹶大山，出社會過後第一擺尋頭路、面試。第一擺總係分人印象深刻，因為「萬事起頭難」，愛行出第一步無恁該，需要當大个勇氣搵決心。

佢印象最深个第一擺係參加演講比賽。在參加比賽前佢斯在網路肚看過別人比賽个影片，看著佢兜仰會恁慶，在臺頂講到口涎波潑完全毋會緊張，乜問自家：「佢敢做得到？」老古人講：「敢去就一擔樵，毋敢去斯屋下愁。」該兩時佢單淨一隻「毋怕，挑戰看啊」个想法，就慇慇四報名落去。

準備比賽个過程，心情就像洗三溫暖樣，表現好斯歡喜靈天，表現差該下又額結結仔當慍悴。正開始練習个時節，單淨企在臺頂講兩句話就緊張到激激顫，成時還講到迪迪凸凸、結舌締確。有一擺練習，佢在臺頂講無一分鐘，續下來愛講麼个嘎全部毋記得淨淨，就恁樣在臺頂「罰企」到鈴仔響正下臺。下臺个時節佢敗勢到面紅濟炸，見笑到尋無空好囡，實在還慘哦！

人講「人愛人打落，火愛人燒著」，經過這擺失敗个經驗，

佢搵自家講，定著愛較增志兜，做毋得過發生共樣个情況。想起指導佢个先生識講過：「準備个過程若係逐步行來實實疊疊，自然上臺就毋會緊張。」所以佢開始調整自家準備个方法，多看新聞搵文章、多聽別人个經驗搵見解、多寫演講稿、多練習企在臺頂講話，還過練習過後有問題斯多問、多請教。就恁樣一步一腳跡，漸漸仔試著自家个表現有兜仔進步，上臺毋會過恁緊張咧。

總算，到了上臺比賽這最關鍵个一步，俗話講：「臺上三分鐘，臺下十年功。」雖然佢無花到十年个時間，毋過因為有平常个煞猛練習做基礎，分佢在臺頂講來順順序序、自信淦淦。

在講煞下臺行禮該一瞞目之間，佢腦膈肚想起一幕幕對開始準備到這下一路練習个畫面。過程中有辛苦、懊惱，乜有快樂、歡喜，不管比賽个結果仰般，好得該兩時決定行出第一步來報名參加比賽，這擺寶貴个經驗定著會變成佢未來生活个養分！

編號 2 號

【釣魚仔个回憶】李文煥原作

在苗栗市撈公館鄉个合界，有一條筆直个經國路，順等路个一片析，係闊野野幾下公里个河壩，河壩个名仔安到「後龍溪」。就在這位，佢留下淦淦个童年影跡，比論講：洗身仔、覓蜆仔、釣魚仔、揸蝦公、放蝦公筍¹……，這兜好搞个事情。係講你也係戴在河壩脣，定著乜撈佢共樣有這兜美好个童年回憶。

回想有一擺佢撈阿公去釣魚仔，該日發生个事情，毋單淨有阿公个溫情，還有佢个想法深深影響佢一生人。該日係一隻熱燂燂个下晝頭，阿公騎等該臺有腳踏仔，還過用箭正會發个老奧多拜載佢去釣魚仔。釣魚仔个河壩脣離佢屋下無幾遠，阿公跔跔尋一埕²生到當高个草竇脣栽棚³，過拿一頂笠嫲分佢戴等，就像係驚死佢分日頭晒傷樣。

佢坐在草影下个大石牯頂，看等阿公拿出釣槓綑好釣線撈釣仔，釣仔頂挽一支浮冇仔，包尾捏一截蟲蟻做釣。佢在脣頭看到嘴擘擘仔，佢公笑等講：「戇孫仔，山精係無？佢舞好勢咧，來

釣魚仔哩啲！」

阿公黏時撈釣槓拂出去，浮冇仔停在遠遠鏡鮮个水面，批啊批仔當久無停動。佢忍毋核問：「阿公！仰般等恁久還言釣著魚仔呢？」阿公細細聲應：「釣魚仔愛有耐心，恬恬等加下就知咧。」

過無幾久，斷真看著釣槓尾緊掣，浮冇仔掙⁴等下沒落水。就看阿公展功夫，兩下半斯釣起一尾大魚仔。佢拍手喊：「哇！阿公還慶！還厲害哪！釣著恁大尾个魚仔。毋過，做麼个毋安加幾隻釣仔，該就做得釣著較多魚仔啊？」

阿公講：「釣魚仔係有學問个，偲俚坐在河壩脣吹等涼沁沁个風，定定仔等魚仔來食釣，這係當鬆爽過享受个時間。一擺安忒多釣仔，若係堵好魚仔共下來食釣，搥到釣線斷忒，該就係『用飯撈屎水——無採工』咧。還過偲俚毋好用有倒釣个釣仔，倒釣斯會撈魚嘴搥滑忒，恁樣係當粗殘个事情。」

臨暗仔愛轉个時節，阿公單淨擇兩尾大尾个魚仔轉去，伸著十過尾細尾个做下放轉河壩，佢講：「偲俚毋好像『狗食牛屎——貪多』，細魚仔放轉去，下二擺偲俚正有大魚仔好釣啊！」

¹ 蝦公筍：音 ha gung` ho；竹製品，捕蝦工具。

² 埕：音 pu；量詞，堆。

³ 栽棚：音 cai pang；安置、準備的意思。

⁴ 掙：音 dui'；瞬間拉扯。